

龙溪精舍丛书

龙溪精舍丛书

前漢孝昭皇帝紀卷第十六

荀悅

皇帝戊辰卽位年八歲謁高廟三月甲申孝武帝葬茂陵帝姊鄂邑公主益湯沐邑爲長公主供養省中大將軍霍光秉政領尙書事車騎將軍金日磾左將軍上官桀副焉夏六月赦天下秋七月有星孛於東方濟北王寬坐諄人倫祝詛有司請誅上遣大鴻臚利召王王以刃自刎死賜長公主及宗室昆弟各有塋追尊趙婕妤爲皇太后起雲陵冬匈奴入朔方殺略吏民發軍屯西河左將軍桀行北邊

始元元年春二月黃鵠下建章宮太液池中公卿上壽

賜諸侯王列侯宗室金錢各有差已亥上耕於鉤盾弄
田益封燕王廣陵王及鄂邑長公主各萬三千戶夏爲
太后起園廟雲陵益州廉頭姑繒牂牁談指同竝二十
四邑皆反遣水衡都尉呂破胡募吏民及發犍爲蜀郡
奔命擊益州大破之有司請河內屬冀州河東屬并州
秋七月赦天下賜民百戶牛酒大雨渭橋絕八月齊孝
王孫劉澤謀反欲殺青州刺史雋不疑發覺皆伏誅遷
不疑爲京兆尹賜錢百萬金日磾輔政歲餘病困大將
軍光白封日磾卧授印綬一日薨賜葬具冢地送以輕
車介士軍陳至茂陵諡曰敬侯閏月遣故廷尉王平等

五人持節行郡國舉賢良問民所疾苦冤失職者冬無
冰

二年春正月大將軍光左將軍桀皆以前捕斬反虜侍
中僕射莽何羅重合侯馬通功封光爲博陸侯桀爲安
陽侯時衛尉王莽子男忽侍中揚語曰帝病忽常在左
右安得遺詔封三子事羣兒自相貴耳光聞之切讓王
莽莽酖殺忽以宗室母在位者舉茂才劉辟彊劉長樂
皆爲光祿大夫辟彊守長樂衛尉三月遣使者振貸貧
民毋種食者秋八月詔曰往年災害多今年蠶麥傷所
振貸種食物收算毋令民出今年田租冬發習戰射士

詣朔方調故吏將屯田張掖郡

三年春二月有星孛於西北秋募民徙雲陵賜錢田宅
冬十月鳳凰集東海遣使者祠其處十一月壬辰朔日
有食之

四年春三月甲寅立皇后上官氏赦天下詞訟在後二
年前皆勿聽治初桀子安聚霍光女結昏相親光每休
沐出桀常代光入洩事鄂邑蓋長公主私近子客河間
丁外人上與大將軍聞之不絕主驩有詔外人付長主
長主內周陽氏女令配耦帝時上官安有女卽霍光外
孫安因光命內之光以爲尙幼不聽安素與丁外人善

說外人曰聞長主內女安子容貌端正誠因長主時得入爲后以臣父子在朝而有椒房之重成之在於足下漢家故事嘗以列侯尙主足下何有不封侯乎外人喜言於長主長主以爲然詔召安女入爲婕妤安爲騎都尉月餘遂立爲皇后以后父封桑樂侯食邑千五百戶遷車騎將軍夏六月皇后見高廟賜長公主丞相列侯中二千石以下及郎吏宗室錢帛各有差徙三輔富人雲陵賜錢戶十萬秋七月詔曰比歲不登民匱於食流庸未盡還往時令民共出馬其止勿出諸給中都官者且減之冬遣大鴻臚田廣明擊益州廷尉李种坐故縱

前漢紀
卷十六
三
死罪棄市

五年春正月追尊皇太后父爲順成侯夏陽有男子乘黃犢車詣北闕自謂衛太子上使公卿中二千石雜識視之聚觀者數萬人右將軍勒兵闕下以備非常丞相已下至者並不敢言京兆尹雋不疑後至叱從吏收之或曰是非未可知且安之不疑曰昔衛蒯瞶違命出奔輒拒而不納春秋美之今衛太子得罪先帝亡不卽死今自來此是罪人也遂送詣獄窮治姦詐遂訊服本夏陽人也姓成名方遂居湖以卜筮爲事有故太子舍人嘗就方遂卜謂之曰子之貌甚似衛太子遂緣其言乃

詣闕廷尉還召其鄉里張祿者皆識知之方遂坐誣罔
腰斬一云姓張名延年霍光曰大臣當用經術土方明
於大義光欲以女妻不疑固辭畏盛滿也後以病免於
家夏六月封皇后父驃騎將軍上官安爲樂鄉侯罷儋
耳番禺九真郡秋大鴻臚田光明軍正王平擊益州斬
捕虜三萬餘人獲畜產五萬餘頭

六年春正月上耕於上林二月詔有司舉賢良文學問
民疾苦議罷鹽鐵榷酤中郎將蘇武自匈奴還武京兆
人故將軍建之子初使匈奴張勝爲副及假節使常惠
等從是時渾邪王姊子句町王及長水虞常皆前歸漢

後降在匈奴中復欲歸漢謀殺匈奴近臣衛律律者本長水湖人也生在漢中後降匈奴常惠素與勝善勝知其謀會事發覺勝乃語武武驚曰事如此必及我見禍乃死後矣欲自殺常惠等止之單于召武受辭武曰屈節辱命何面目以生引佩刀自刎絕半日復蘇單于嘉其節欲降之後疾愈單于將殺虞常等召武皆會欲因此際降武先擊虞常等令衛律以劒擊勝勝請降律後以劒擬武武不動律曰律前負漢歸匈奴賜號稱王擁眾數萬蘇君今日降明日復然空以身膏草野誰復知之君因我降與君爲兄弟今不聽吾計雖欲復見我尙

可得乎武怒罵律曰汝爲人臣不忠背叛於何用

見汝爲兄弟乎律知武終不可脅單于欲必降之乃置武大窖中絕不與飲食七日天雨雪武嚙雪與旃毛并咽之數日不死單于徙武北海無人處使牧羝羊曰羊有乳乃得歸漢武掘野鼠草實而食之杖漢節牧羊臥起操持節毛盡落五六年單于弟於靬王弋獵海上見武能結網紡繳繁治弓弩於靬王愛之陰給衣食賜武馬畜三歲餘於靬王死丁零盜武牛羊武復窮厄會李陵降匈奴單于使陵降武謂武曰陵來時子卿太夫人已死妻已更嫁昆弟或抵罪或疾病死室家已盡今

單于必欲降子卿子卿終不得歸矣人生如朝露何久
自苦如此陵始來時忽忽如狂自以痛負漢子卿不欲
降何以過陵武曰臣事君猶子事父也子爲父死無所
恨願勿復言陵與武飲酒數日復曰子卿一聽陵言武
曰自己分死久矣少卿必欲降武武請畢今日之歡效
死於子前陵見其至誠喟然歎曰嗟乎義士陵與衛律
罪上通天因泣下沾衿與武洩去後武聞武帝崩南向
號哭數日嘔血及上卽位與匈奴和親漢使至匈奴常
惠數私見使教之曰陛下親射上林中得白鴈足有繫
帛丹書言武等在荒澤中使者以語單于單于驚謝使

者曰武等實在許遣之於是李陵置酒賀武曰今足下
還歸名揚於匈奴功顯於漢朝雖竹帛所載丹青所畫
何足以過子卿陵雖驚怯漢且貫陵罪得全其老母得
奮大恥之節志在庶幾乎曹劌於柯之盟此陵宿昔所
不怠也今漢收族陵家爲世大戮陵當復何顧乎吾已
矣令子卿知吾意耳異域之人一別長絕陵起舞歌曰
經萬里兮渡沙漠爲將軍兮奮匈奴路窮絕兮矢石摧
士眾滅兮名已頽老母已死雖欲報恩將安歸兮單于
遂遣武歸漢而陵終匈奴中初武使出百餘人在匈奴
十九年凡從還者九人詔武謁孝武陵園廟拜爲典屬

國賜錢二百萬公田十二頃宅一區常惠徐勝趙終王
良等拜郎中賜帛各二百匹其六人賜錢各十萬歸家
復終身夏大旱雩秋七月罷榷酤官取天水隴西張掖
各二縣以爲金城郡句町侯無波帥其君長人民擊反
者有功立無波爲句町王

元鳳元年春立泗水戴王子援爲泗水王戴王前薨以
無子國除後宮有遺腹子援相內史不以奏言上聞而
憐之乃立援爲王相內史下獄武都氏人反遣執金吾
馬適建等將三輔太常徒皆免刑擊之夏六月赦天下
秋七月乙亥晦日有食之旣九月鄂邑長公主燕王旦

左將軍上官桀桀子驃騎將軍安御史大夫桑弘羊皆
謀反伏誅上官桀父子驕放長公主供養上於內桑弘
羊爲國興利自伐其功各欲爲子弟黨類求官以私於
光光不聽由是與光爭權欲害之詐使人爲燕王旦上
書言光出都肄邸羽林道上稱警蹕太官先置又擅調
發益幕府校尉光專權自恣疑有非常候光休沐日奏
之桀欲從中下其事弘羊當與大臣共執退光書奏上
不冑下召光光入上曰此書詐也將軍無罪光曰陛下
何以知之上曰以將軍之廣明都肄邸皆道屬耳調校
尉未滿十日燕王何以得知之且將軍爲非不須益幕

府校尉時上年十四左右尙書皆驚而上書者果亡後
桀等數毀光上輒怒曰大將軍忠臣先帝所屬以輔朕
躬敢有毀者坐之自是桀等不敢言乃謀令公主置酒
請光伏兵殺之因廢帝誘迎立燕王燕王至殺之因立
桀爲帝燕王與驛者書相報許立桀爲王外連諸郡國
郡國豪傑以千數燕王以爲事必成令羣臣皆裝是時
天大雨虹下屬燕王宮宮中井水皆竭有黃鼠舞燕王
殿前端門中視之不去一日一夜死者數千殿上戶自
閉不可開廁中豕羣出壞竈銜釜六十枚置殿門前烏
鵲自鬪宮中烏死天火燒燕南城門大風壞宮城樓板

樹木流星墜地后妃已下皆恐王驚病燕占災者言當有兵圍城其在十月漢當有大臣戮死者會蓋主舍人父燕倉知其謀以告大司農楊敞敞告諫議大夫杜延年以聞桀等伏誅燕王聞之謂相平曰事已敗遂發兵乎相平曰左將軍已死百姓皆知之不可發也王憂懣會賓客羣臣置酒會使者至賜王璽書曰與王骨肉至親敵吾一體乃與他族異姓謀害社稷親其所疎疎其所親有悖逆之心無忠愛之義如使古人有知當何面目復奉齊酎見高祖之廟乎旦以綬自絞死后夫人隨王死者二十餘人詔赦燕太子建爲庶人諡旦曰刺王